

## KA UITATIKUMAT

Ishpashtien Nuna

Puamu ne. Utauia muk<sup>u</sup> uitamueu peuamut.

— Nipuatau, iteu nenua, ne ka-ashapua atik<sup>u</sup> ka itit mishkumit. Eukan peik<sup>u</sup> ka-ut pashikutaka, nitishinuau. « Tshui uitshimitin », ka-nitikua, nitishinuau.

Ek<sup>u</sup> apu nishtutuat ne tshishennu nenu tshe utinikuniti nenua ukussa, ek<sup>u</sup> ititueu : « Muk<sup>u</sup> tshika nipaieu atikua. »

— Eukan ma tshipa peshuapamau eshinamin, iteu.

Ekue tshitutet ne anite ka ishinak. Auennua mishkumit tapue shiatshuakaik, mishkumit mishta-mitshetinua atikua, ashapinua. — Ne at pinashueian, iteu, ka-ninatikua, ka-ut pashikutaka peik<sup>u</sup>, uana ite ka-pet natakashkua, nitishinuau, iteu.

Eukan tapue ka ishinak, miām eukan eshinakuannit.

Ekue pinashuetutuat nenua atikua, shash uesha nete natakashkunua peik<sup>u</sup>. Utatshapiu tanite, atshapia nenua apatshieu. Ekue pinashuet. Uiapamat pietuteniti pet atikua, peikussinua, aiakuashk<sup>u</sup> petutenua. Ek<sup>u</sup> ne tshishennu (ne upinu kie nenua utishkuema) ek<sup>u</sup> iteu nenua peik<sup>u</sup> :

— Tshutess, nanatutame tshe eka tapuetakukue, itakanu.

Tshe uauatshishkupanin tapuetakuti, pet tshitiniati kau.

Ek<sup>u</sup> niatat. Aiakuashk<sup>u</sup> pet petutenua. Apu tshi pimutakuatat ekue shatsheueshkakut tshek.

— Ei, itiku, eka pimutakuashi !

Ekue natikut ekue aimikut :

— Tshui uitshimitin, itiku. « Uitshimme », nitik<sup>u</sup> nutaui.

— Tanite nipa ishinakushin natu tshi uitshimitan ? Eukuan nipa itapin, anite tshitshipaitunanuti, iteu nenua.

— Mauat, itiku.

— Kie nipa shikatshin, iteu.

— Mauat, itiku, mitshuap ne, neme ka-apinanitaka. Tan etenitamin anite tshitshit etaini ?

— Eku eshpa, enuet tshe uitshimitan, iteu.

Ek<sup>u</sup> natutam<sup>u</sup> ne uin Tshutess; « tshika uitshimitin » etikut, ek<sup>u</sup> niashipishkupanit. Ekue tshitinat nenua, uauatshishkupanitak. — Tapuetakunitaka, itakanu.

— Tshikashkuat tshimanat, iteu, eukuanat muk<sup>u</sup> nakashat, kie tshitashamat. Muk<sup>u</sup> tshitatshapi tshe eka patshitinat, eukuan muk<sup>u</sup> tshe takunat.

Ekue natat.

— Miam e tshiuekapauiani, iteu, tshe teshtepaimin ne e takusseiani, tshe pet teshtepauin.

Eukuan eitit tapue. Ekute nekatat nenua utashama, ukashkua kie.

Ekue tshituteht ekue matashkupaituht. Ekue pitshemepataniti utishkuema, kie uin. Ekue tshitinat nemenu eshavinannut. Ashavinua anite tuashkam. « Miam pitutsheiat mitshuap », itenitam<sup>u</sup> katshi anite takushinit. Ek<sup>u</sup> ne upinu (nenua umushuma) ekue pashikut  
ekue tshatshimamat nenu eshimakushiniti nenua unatshima.

— Ei, ei, itiku nenua utishkuema, « uitshimme » ka ui itat tshitanishinan.

Kau ekue patapipanut (miatenitaki atik<sup>u</sup>, eukuan eitit nenu

ka-tshakanueuiua), kau ekue patapipanitat nenu ushui. Ekute etat.

Ek<sup>u</sup> ueniakanit ne auass, ekuannu peuatat. Netuapamakanit, miamtitakanit, ekuannu ka puamut. Ek<sup>u</sup> metitakanit, peuatat ne, peikutipishkua eka etat. Tshekennua, utatshapia pemishinniti !

— Tan eukuan tshe itapit, itakanu, tshitshipaitunanuniti.

Mishkumit tau ne atik<sup>u</sup>, ek<sup>u</sup> ekute niate nakateshapan nenua utashama kie ukashkua, muk<sup>u</sup> utatshapia apu taniti. Ek<sup>u</sup> tshetshipataht. At nutshikuakanit atik<sup>u</sup>, mauat. Nipaiakanu kassinu, muk<sup>u</sup> uin apu nipaiakanit, utishkuema mak nenua umushuma mak ukuma. Eukuan neu apu nipaiakanih muk<sup>u</sup>. Ekue taht ma anite, pinim ekue pipunnit. Etaht anite pepunnit.

Tekuatshinnit ma :

— Ek<sup>u</sup> tshe tuuariat<sup>1</sup> nitanish, iteu (tekuatshinnit uashtessiu-pishimua).

Ek<sup>u</sup> teuah, ek<sup>u</sup> uinuau anite etaht mitshuapit. Anite pashashkuanu tepishkaniti ekute e tatuetaminiti nenua umushuma. Tshek ekue shatshuapamat nenua umushuma, tanite minashkuanu anite. Tshek uiapamat eshinakushiniti : mishta-tshimakatenua, ka-ishueiaukanishitaka eshinakushiniti nenua umushuma. Iteu nenua utishkuema :

— Tshika punu mak au tshutaui e tuuat.

(Ekuannu nenu tshipa ut nipipan itakanu ne e uishakut atik<sup>u</sup>. Atut nita tshi punipan mate eshinakushit, tshimakateu.) Ekue punit e tuuat ekue takushinit.

— Tshekennu tshe piminutak<sup>u</sup> ? iteu.

— Utshituna, itakanu.

---

<sup>1</sup> Tshe uishakuiat.

Utshituna ekuannua peminutakanit ne. Umushuma pinim ekue tatshipuniti tapue, minuat kau ka ishinakushiniti ekue ishinakushiniti. Ek<sup>u</sup> etaht anite. Uapameu mani umushuma tanite muk<sup>u</sup> uashituashiku. Nete mani pushu ne, shash ekue uapamat iapeutikua, shash ekue nipaiat mani (nuela unatshima) muk<sup>u</sup> eukuan eshinakushit.

Ek<sup>u</sup> shakuannit :

— Ek<sup>u</sup> tshipa natu-tanau nitanish, iteu (eukuannu ka-tshitshipataua atik<sup>u</sup> uetatinitti).

Ek<sup>u</sup> tshetshipaituht, mishta-minuakuneutinnu tshetshipaituht. Nete ma ishpish shashkannit, ekute etaht itakanu, anite panakutenu ekute eitaht, shashkannu shash. Tepishkanit uetatinnit minuat, ek<sup>u</sup> tshetshipaituht minuat, anite eshpaituht. Ekute ashtenipan nenu ututuau. Memaushuniti, pipanakutet anite mimitshishunua utishkuema, ek<sup>u</sup> anite uin apu.

— Ei, iteu, ueshausham eka tshikashunaua.

Eukuannu tsheshimikut ne ishkueu (shash apishissishinipani utauassima, utauassimuaua shash tanua). Tshauepatat ne ishkueu ekue uitshipitat nenua ukauia.

— Tan etin ek<sup>u</sup>, itiku, ka-tshitshiuepatanaua ? Ek<sup>u</sup> tshe neshtumut nana nussim.

Tan etishk ?

— Eukuan eshit, iteu : « Ueshausham eka tshikashunaua », nitik<sup>u</sup>.

— Tan apat a nenu tshitik<sup>u</sup> ? itiku. Matshi ek<sup>u</sup> natuapam nussim, tshika neshtumu.

— Eshe, iteu.

Ek<sup>u</sup> tshetshipatat. Eshk<sup>u</sup> ekute etat nahi uin napeu, uetitshipitat. Ek<sup>u</sup> eitaht ma anite.

Ek<sup>u</sup> tshauetapeht ututuau, uetitaht umushumuaua. Eukuannu ma ek<sup>u</sup> tshe tshitshipaituht.

— Eukuan nitanish, iteu, tshe itutaitikut, anite tshe taiek<sup>u</sup>. (Eukuan ne atikutshuap, takuan ka-inanua. Tanite anite takuanitshe ?) Eukuan tshe itutaitikut, anite tshe taiek<sup>u</sup>, tshe eka nita nekatshiuiek<sup>u</sup>. Tshinuau tshika tipenitenau. Tshinuau tshe tshissenimekut tshe tutuekut tshitshinniuuat, iteu.

(Eukuan ma ne takuanitshe, takuan anite atikutshuap ka-inanua.) Anite eshpaituht.

— Eukuan ume, iteu. Ekute ma ute tshe taiek<sup>u</sup>.

Eukuan eshkuapetshishit.

